

Rabu, 7 Ogos 2019 | 10:54am



PRESIDEN MBM, Jufitri Joha.

## Kos sara hidup belia perlu dipandang serius - MBM

Oleh Syalika Sazili  
bhnews@bh.com.my

**KUALA LUMPUR:** Majlis Belia Malaysia (MBM) menyarankan kerajaan supaya memandang serius terhadap isu kos sara hidup dalam kalangan belia.

Presiden MBM, Jufitri Joha, berkata ini merangkumi isu seperti pendidikan, pengangkutan awam dan kesihatan.

Beliau yang juga Ahli Majlis Tindakan Sara Hidup Negara (NACCOL), berkata sesi dialog yang diadakan bersama Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail, sebelum ini banyak menyentuh perkara berkenaan yang bertujuan membantu majlis itu merangka pelan strategik dalam mengawal isu ini.

“Antara isu yang banyak menjadi persoalan dalam kalangan peserta adalah hal berkaitan pemilikan rumah dan bantuan pendidikan yang berkurangan.

Selain itu, peserta sesi dialog juga memuji inisiatif pihak kementerian dalam memperkenalkan inisiatif Food Bank serta pas perjalanan tanpa had My100 dan My50 yang sedikit sebanyak mengurangkan beban kos sara hidup dikalangan belia.

“Beliau (Saifuddin) turut tertarik dengan beberapa input serta idea baru yang dicadangkan termasuklah penyediaan latihan kepada majikan dalam menerima pekerja Orang Kurang Upaya (OKU). Keperluan pemberian subsidi dalam pembelian alat bantuan golongan itu yang harganya mahal di pasaran turut mendapat perhatian serta akan dipertimbangkan untuk diberikan potongan cukai,” katanya dalam satu kenyataan, semalam.

Sehubungan itu, MBM menyokong penuh agar sesi dialog ini turut diadakan di peringkat negeri sebagai platform belia akar umbi dalam menyampaikan hasrat di samping membantu pihak KPDNHEP mendapatkan input.

“MBM menyeru supaya belia mengambil peluang ini untuk menyampaikan isi hati dan hasrat mereka kepada pihak kerajaan berdasarkan tujuh kluster utama (kesihatan, pendidikan, utiliti, perumahan, e-dagang, pengangkutan, makanan) yang mempengaruhi kepada kos sara hidup belia dan rakyat,” katanya.

